



Inatsisartuni ilaasortaq Hr. Otto Jeremiassen
/MAANI

01.28/2008-10
7. februar 2008
Postboks 269
3900 Nuuk
Oq/tel +299 34 50 00
Fax +299 32 47 04
aapip@gh.gl
www.nanoq.gl

Kilisaatini inuttat atugaanut tunngatillugu Naalakkersuisunut apeqquummut akissut

Kilisaatini inuttat atugaasa pitsanngorsarneqarnissaannut Naalakkersuisut qanoq suliniu-teqarniarnerat pillugu apeqqutitit Naalakkersuisoqarfinitit tiguneqarput ulloq 23. januar 2008.

Aallaqqaatigalugu ilisimatitsissutigissavara akissarsianut atorfeqartitaanernullu tunngasuteqartut illuatungeriit tassalu sulisut sulisitsisullu akornanni isumaqatiginiutigineqartartussaammata, taamaasillutillu illuatungeriit akissarsiat atorfeqartitaanernullu tunngassuteqartut namminneq isumatigiissutigisinnaasarlugit. Sulisut sulisitsisullu kiffaanngissuseqarlutik isumaqatigiinniarsinnaatitaanerat Naalakkersuisunit akuleruffigineqarneq ajorpoq.

Apeqqutigisatit aallaavigalugit kattuffiit suliffeqarfillu susassaqartut paasissutissanik pisarsiffiginiarlugit apeqquteqarfigisimavagut. Ajoraluartumik kilisaataatileqatigiit anginerit marluk apeqqutigisavut akiumasimangilaat. Taamaattumik akissutigisassakka KNAPK-ip Kalaallit Nunaanni Sulisitsisut Katuuffiata kilisaataatileqatigiiffiullu ataatsip akissutaanit taamaallaat tunngaveqarput.

Apeqqutigisatit makkuupput:

Sooq inuttat atortussanut, nerisassanut, orsussamut allanullu akileeqaataatinneqartarpat?

KNAPK-ip aalajangersagai naapertorlugit inuttat nerisassanut orsussamullu akissarsiaminnit taamaallaat ilanngaaneqartartussaapput akissarsisinneqannginnerminni. Orsussamut aningaasartuutit kilisaataatileqatigiit inuttallu avillugit akilertartussaavaat.

APK-ip massakut atorunnarsinneqarsimasup atorfinitsitaanermi nalinginnaasumik isumaqatigiissutaa naapertorlugu aningaasartuutit makku ilanngaatineqarsin-naapput: neqitassat, piniarnermi sillimmatit, assartuinerit tassunga ilanngullugit nammineq angallatigisaq atorlugu assartuinermi toqqaanartumik aningaasartuutit, orsussa, tuniniaanermi aningaasartuutit, tunisassiornermi aningaasartuutit soorlu poortuutissat, taratsut plastikkit kiisalu pisortat akitsuutaat suugaluartulluunniit imaluunniit akitsuutit akiliutissallu allat aalisarnermut toqqaanartumik attuumassuteqartinneqartartut.

Sooq inuttat atortussanut akileeqataatinneqaraangamik akiliutigisimasatik akileraarutitigut ilanngaatigisinnaasannngilaat?

Inuttat akileeqqataaffigisimasaminnut akiliutigisimasatik akileraarutitigut ilanngaatigisinnaasanninnerannut apeqqummut tunngatillugu oqaatigineqassaaq kilisaatini inuttat tamakkiisumik aningaasarsiaat amerlanertigut tassaasarmata pisanit isertitanit pissarseqataasutit. Kilisaatini inuttat atortussanut orsussamullu aningaasartuutigunnagaat akileraarutissat naatsorsorneqannginneranni tamakkiisumik akissarsiaanit ilangaatigineqartarput. Kilisaatini inuttat akissarsiaat tassaasarpur tunniunneqartut.

Assersuut:

Kilisaatini inuttap angalanermi ataatsimi isertitanit pissarsiassai 20.000 kr.-iupput. Atortussanut orsussamullu aningaasartuutitut akileeqqataasutissai 2.000 kr.-iupput. Akileraarutitissat naatsorsorneqarneranni aallaviusussaq tassaavoq 18.000 kr. (20.000 minus 2.000).

Nerisassanut aningaasartuutit nalinginnaasumik namminerisamik aningaasartuutitut isigineqartarput, akileraarutit ilanngaatigineqarsinnaangitsut.

Taamaakkaluartoq nerisassanut aningaasartuutaanerusimasut uppersarsarneqarsinnaasut akileraarutit ilanngaatigineqarsinnaasarpur pineqartoq inuussutissarsiumminut atattillugu Kalaallit Nunaanni illoqarfigisami avataaniisimappat tamatumalu kingunerisaanik nerisassanut aningaasartuuteqarnerusussannngorsimalluni. Tassungali tunngatillugu piumasaaqataavoq akileraarutit ilanngaatigineqartussaangitsunik ullormusiaqannginnissaa aamma/imaluunniit angalanerminut tunngatillugu ajunngitsorsianik ataatsikkoortumik pissarsimannnginnissaa.

Ilanngaat tassaavoq ullormut "akeqanngitsumik nerisaqartitaanerup" nalinga Naalakkersuisunit aalajangersarneqarsimasup nikingassutaa. 2008-imut tunngatillugu akeqanngitsumik nerisaqartitaaneq ullormut 79 kr.-iusussatut Naalakkersuisunit aalajangersarneqarsimavoq.

Assersuut:

Kilisaatini inuttaq sulisitsisuminut nerisassanut ullormut 100 kr.-imik akiliuteqartarsimappat, ukiumi aningaasarsiorfiusumi 2008-imi kilisaatimiinermini ullormut 21 kr.-imik ilangaatigineqartassaaq (100 kr. minus 79 kr.). Kilisaatinili inuttap uppersarsarsinnaasariaqarpaa ullut qassit kilisaammiisimanini aammalu nerisassanut qanoq aningaasartuuteqarsimatiginini. Paasissutissat tamakku pineqartut akissarsiaasa allagartaani nalinginnaasumik takuneqarsinnaasarpur.

Naalakkersuisut pilersaaruteqarpat siunissami inuttat atugaat pitsanngorsassallugit soorlu soraarnerussutisiaqalersinnaaneq tamatumani eqqarsaatigalugu?

Naalakkersuisut isumaqarpur soraarnerussutisiaqalersinnaaneq inuup nammineerluni isummerfigisassarigaa, inuttat namminneerlutik isumagisariaqagaat.

Aningaasarsiat tunniunneqartarnerat qaammatit tamaasa inuttassaminnut tunniunneqartarnerat atortinneqarpa?

KNAPK-ip aalajangersagai naapertorlugit aningaasarsiassat piaarnerpaamik tunniunneqartartussaapput, ima paasillugu tulaasinermit ullut 7-it qaanngiutsinnagit. Aalajangersagaq avaqqutaarneqarsinnaavoq qaqugukkut aningaasarsisarnissaq inuttap angallammillu piginnittup akunnerminni isumaqatigiissuteqarnerisigut.

APK-ip massakut atorunnaarsinneqarsimasup inuttaqartitsinermit nalinginnaasumik isumaqatigiissutigisimasai naapertorlugit umiarsuatileqatigiit angalanermit pisat naatsorsoreernerisa kingorna periarfissaq siulleq atorlugu inuttat akissarsisinneqartartussaapput.

Inussiarnersumik inuulluaqqusillunga

Finn Karlsen

Aalisarnermut, Piniarnermut, Nunalerinermullu Naalakkersuisoq